



## DEPUTACIÓN DE LUGO

### *Servizo de Xestión Tributaria e Recadación Provincial*

#### **REFORMA DAS BASES QUE REXEN A ACEPTACIÓN E ASUNCIÓN, POR DELEGACIÓN EXPRESA, DE COMPETENCIAS EN MATERIA DE XESTIÓN, INSPECCIÓN E RECADACIÓN EN RELACIÓN A TRIBUTOS, PREZOS PÚBLICOS E OUTROS INGRESOS DE DEREITO PÚBLICO.**

##### **BASE PRIMEIRA. - Obxecto da delegación**

A Excm. Deputación Provincial de Lugo de conformidade co disposto no art. 106.3 da Lei 7/1985, do 2 de abril, Reguladora das Bases do Réxime Local e o art. 7 do texto refundido da Lei Reguladora das Facendas Locais, aprobado polo Real Decreto Lexislativo 2/2004, do 5 de marzo, asume, por delegación expresa dos concellos da Provincia, as competencias que se concretan nas bases seguintes, en relación aos tributos, prezos públicos e outros ingresos de dereito público.

##### **BASE SEGUNDA- Réxime Xurídico**

Para o exercicio das competencias delegadas, a Deputación Provincial aterase ao disposto nas presentes bases, ao ordenamento xurídico local e demais lexislación aplicable de conformidade coa normativa reguladora das facendas locais, así como normativa en materia de xestión, inspección e recadación que puidese ditar a Excm. Deputación Provincial de Lugo, en uso da potestade regulamentaria prevista no art. 106.2 da Lei 7/1985 do 2 de abril.

A Deputación Provincial, segundo o réxime de competencias dos seus órganos, poderá ditar disposicións sobre interpretación ou aplicación da normativa anterior, e aprobar os períodos de pagamento de cada un dos tributos.

##### **BASE TERCEIRA. - Contido e alcance da delegación.**

Os concellos que desexen delegar na Deputación Provincial competencias nesta materia podrán facelo co seguinte contido:

-Todas as competencias que os concellos teñan atribuídas en materia de xestión, inspección e recadación, tanto en período voluntario coma en período executivo, reguladas no vixente texto refundido da Lei reguladora das Facendas locais, xa estean atribuídas, directamente, pola propia norma, ou sexan asumibles en virtude dos convenios de delegación ou acordos de colaboración que a Deputación Provincial puidese celebrar con calquera das Administracións públicas, dos seguintes impostos:



## DEPUTACIÓN DE LUGO

### *Servizo de Xestión Tributaria e Recadación Provincial*

- 1- Imposto sobre Bens Inmóbles
- 2- Imposto sobre Actividades Económicas
- 3- Imposto sobre Vehículos de Tracción Mecánica

- Os concellos, a maiores, poderán delegar as seguintes competencias, sempre que a Deputación Provincial dispoña dos medios persoais e materiais necesarios para asumilas, que aceptará unha vez incorporados o medios citados:

1- As competencias que teñen atribuídas en materia de xestión, inspección e recadación, tanto en período voluntario coma en período executivo, do Imposto sobre o Incremento de Valor dos Terreos de Natureza Urbana.

2-As competencias que, teñen atribuídos en materia de recadación, en período voluntario e período executivo, en relación a tributos, prezos públicos e outros ingresos de dereito público, todos eles de carácter periódico anual e notificación colectiva mediante padrón. O devandito padrón anual poderá, como máximo, fraccionarse en dúas cotas semestrais, sempre que o concello titular recolla esta circunstancia na correspondente ordenanza fiscal municipal.

3-As competencias de xestión recadatoria en período executivo de todas aquelas débedas derivadas de liquidacións periódicas, ou non periódicas, realizadas polos concellos en período voluntario, incluídas as sancións e aquelas outras derivadas dun acto administrativo, en virtude do cal houbese de satisfacerse cantidade líquida

**BASE CUARTA.** - Alcance do exercicio das competencias delegadas.

A delegación de competencias supón que, a Deputación Provincial, asume a totalidade de funcións e atribucións, tanto en relación a actuacións materiais, como executivas.

Os concellos poderán avocar para si, coa conformidade da Deputación Provincial, a tramitación de determinados expedientes que, pola súa repercusión económico-social, resulte aconsellable.

Calquera outra actuación do concello no ámbito das competencias delegadas suporía un incumprimento das presentes bases.



## DEPUTACIÓN DE LUGO

### *Servizo de Xestión Tributaria e Recadación Provincial*

En ambos os dous supostos, por parte da Deputación, procederase a formular data das liquidacións ou cargos a afectados, e quedará exenta de responsabilidades que puidesen producirse no futuro, e sen que poidan ser cursadas de novo para continuar o procedemento.

En particular sinálanse como competencia da Deputación:

-Declaración de insolvencias e créditos incobrables.

-Actuacións xudiciais en relación a procedementos realizados pola Deputación no marco destas bases, e actuacións xudiciais en materia concursal.

#### BASE QUINTA. - Mellora da xestión tributaria dos concellos

A Excm. Deputación Provincial de Lugo poderá, directamente ou mediante convenio con outras administracións públicas, prestar a súa colaboración para a mellora da xestión tributaria dos concellos, podendo proceder á contratación, con empresas especializadas, de traballos de asistencia técnica, ás condicións da cal poderán acollerse os concellos interesados.

#### BASE SEXTA. - Formas de xestión.

A Deputación Provincial poderá exercer as competencias delegadas a través de calquera das formas de xestión de servizos previstos pola Lei.

#### BASE SÉTIMA. - Contías mínimas

Non se procederá á xestión (liquidación ou recadación) daquelas débedas inferiores á contía que se estime ou fixe como insuficiente para a cobertura do custo que a súa exacción ou recadación represente, segundo os criterios que estableza o Ministerio de Economía y Hacienda en desenvolvemento do art. 16 da Lei 47/2003, de 26 de novembro, Xeneral Presupostaria, ou norma que a puidese substituír.

Non obstante poderanse acumular aquelas débedas inferiores á citada contía, referidas a un contribuínte e concepto, polo mesmo exercicio económico.



## DEPUTACIÓN DE LUGO

### *Servizo de Xestión Tributaria e Recadación Provincial*

#### **BASE OITAVA- Cargos en período executivo**

Os cargos que realicen os concellos para a súa xestión recadatoria en período executivo, haberán de acompañarse dun soporte informático no que se incorporen todos os elementos das débedas tributarias. Os devanditos cargos haberán de ser remitidos á Deputación Provincial, como tempo máximo, no exercicio seguinte a aquel en que se realizara a cobranza en período voluntario.

#### **BASE NOVENA. - Colaboración dos concellos**

Os concellos prestarán á Deputación Provincial de Lugo a colaboración que resulte necesaria para a boa prestación do servizo.

#### **BASE DÉCIMA. - Compensación económica**

Polo exercicio das funcións delegadas a Deputación Provincial de Lugo percibirá unha compensación económica consistente en:

- a) O 1% do principal e dos xuros recadados en período voluntario.
- b) O 75% da recarga en período executivo procedente, e dos xuros recadados neste período

#### **BASE DÉCIMOPRIMEIRA- Entregas a conta**

A Deputación Provincial realizará entregas mensuais, sen custo para os concellos, a conta da recadación en período voluntario das débedas de notificación colectiva por padrón, que ha de recadar en cada exercicio, segundo competencias delegadas.

O importe das entregas a conta calcularase sobre o 90% da recadación, por padróns, do exercicio anterior, repartido en 12 mensualidades.

O importe da recadación do exercicio anterior sobre a que se realizará o cálculo do 90 % poderase axustar en aqueles importes de liquidacións que modifiquen de forma certa o padrón do exercicio no que se realiza o anticipo.



## DEPUTACIÓN DE LUGO

### *Servizo de Xestión Tributaria e Recadación Provincial*

BASE DÉCIMOSEGUNDA- Liquidacións provisionais e definitiva

#### LIQUIDACIÓN PROVISIONAL

A Deputación Provincial, para os efectos informativos, practicará liquidacións provisionais coa seguinte periodicidade:

- Mensual: recadación en período voluntario de padróns.
- Trimestral: recadación en período voluntario de liquidacións individuais e recadación en período executivo.

#### LIQUIDACIÓN DEFINITIVA

No primeiro trimestre do exercicio seguinte practicarase liquidación anual e definitiva e producirase o ingreso do importe definitivo de recadación do que se deducirá:

- O importe das entregas a conta mensuais.
- Devolucións de ingresos indebidos.
- A compensación económica a que se refire a base décima pola prestación do servizo.
- Calquera outro importe que proceda, relacionado coas competencias delegadas.

En relación a esta liquidación anual, unha vez comunicada ao concello este poderá, no prazo dun mes, alegar o que estime pertinente, así como achegar calquera tipo de documentación. Transcorrido o prazo sinalado, sen que se presenten alegacións, a liquidación anual entenderase definitivamente aprobada.

Polo Presidente da Deputación, resolverase sobre as alegacións formuladas e sobre a aprobación definitiva da liquidación anual.

#### BASE DÉCIMOTERCEIRA- Réxime de vixencia

1- As presentes bases terán unha vixencia de dez anos dende a súa publicación no Boletín Oficial da Provincia e o Diario Oficial de Galicia. Sendo o primeiro ano o da súa publicación, e finalizando o 31 de decembro do décimo ano.

2- O prazo inicial de delegación renovarase, automaticamente, por períodos iguais, se ningunha das partes manifesta, expresamente, a súa vontade en contra, mediante acordo plenario adoptado, e comunicado cun mínimo dun ano de antelación á data de vencemento.





*Servizo de Xestión Tributaria e Recadación Provincial*

- 3- Durante a vixencia da delegación, e sen que afecte ao período sinalado nesta, calquera concello poderá ampliar o seu contido dentro do marco establecido nestas bases, mediante acordo plenario comunicado á Deputación Provincial e producirá efecto dende a data da súa publicación no BOP e o DOG.
- 4- Naqueles supostos, debidamente acreditados, en que existan contratos vixentes, ou compromisos ineludibles, adquiridos con anterioridade, entre algún concello e terceiros, procederase igualmente segundo as presentes bases, quedando en suspenso a efectividade da delegación en relación a aquelas competencias que estivesen afectadas polos citados contratos ou acordos, durante a súa vixencia.
- 5- Estas bases manterán a súa vixencia naqueles supostos de cambios normativos que non varíen o réxime de delegación, ou establezan tributos ou outros ingresos públicos que substitúan os actuais.
- 6- Calquera concello que se incorpore, con posterioridade, ao réxime de delegación destas bases farao por un período de vixencia que finalizará na mesma data que o resto de delegacións.
- 7- De non ser aceptadas estas bases por algún concello, manterase a delegación vixente, en réxime de transitoriedade, ata a súa finalización.

**BASE DÉCIMOCUARTA.- Procedemento de delegación e aceptación**

- 1- A aprobación das presentes bases supón a aceptación da delegación que efectue cada concello, se o acordo municipal se axusta a estas.
- 2- Cada concello adoptará un acordo, do Pleno, de delegación de competencias, que se comunicará á Diputación mediante certificación expedida polo seu secretario.
- 3- A Deputación e cada un dos concellos delegantes formalizarán o compromiso, de delegación e aceptación, mediante a sinatura dun convenio que subscribirán os respectivos presidentes.